

Waraga na Paulo öcöö both Pilemon Köp na tye i waraga ka Paulo both Pilemon

Pilemon onwongo obedo Akiricito n'oywek rwök, nen calö ën onwongo obedo ngat acël i kin jö n'oye Kiricito na tye i Kolocai ëka obedo ngat n'onwongo tye k'opii mërë na nyïngë Onecimo. Opii ni onwongo öngwécö ökö kï both adwong mërë ëka ën obino örwatërë kï Paulo, n'onwongo tye i buc. Paulo obino ömïö Onecimo ödökö Akiricito.

Waraga ka Paulo both Pilemon obedo kwac both Pilemon më rïbö watgï gïn k'opii mërë, na Paulo tye ka oro cen yo bothe ëka öjöl ën pathï na calö opii n'ëtïmö kïca kékën ëntö na calö omego n'obedo Akiricito.

Moth n'öya kï both Paulo

¹ Waraga ni öya kï both Paulo, n'obedo amabuc ka Kiricito Yecu, ëka Timoteo ömïn onu,

Both Pilemon okone onu më amara ëka atic awodh onu,

² kï jö n'oye Kiricito na cökërë i odi gïn k'amïn onu Apia, ëka both Arikipo acikari awodh onu:

³ Obanga Apap onu ëka Rwoth onu Yecu Kiricito ömïïwu gum ëka kuc.

Mar ka Pilemon ëka yee mërë

⁴ An apwöyö Obangana i karë kibëc kite na an apo piri i lëgana,

⁵ piën an atye ka winyo köp i kom marni pi jö k'Obanga na leng kibëc ëka yeeni i kom Rwoth Yecu.

⁶ Kite na in itye ka nywakö yeeni ki jö nökenë i güre kanya acël, an alëgö ni ëk iniang na thuth i kom gin na bër kibëc na onu etye ködë i Kiricito.

⁷ Marni ömia yom cwiny na thwönë rwök ëka thon öcükö cwinya, piën in, ömëra, ikweo cwiny jö k'Obanga na leng.

Kwac ka Paulo pi Onecimo

⁸ Pi manön, kadï bed ni an atye ki tæk cwiny i Kiricito na müö an aciki më tio gin mörö na mütërë,

⁹ ëntö pi mar, an anënö ni bër akwai. An Paulo, na bedo ngat n'otii ëka kobedini thon abedo am-abuc pi Kiricito Yecu,

¹⁰ an akwai pi athïn-na Onecimo, na an adökö apap mërë nakun onwongo an atye i buc kany.

¹¹ I karë n'opoth ën onwongo ba tye ki köny mörö bothi, ëntö kobedini ën dong tye ki köny na thwönë rwök bothi ëka botha.

¹² An atye ka oro ën cen yo bothi—na ën obedo dhö cwinya kikome.

¹³ An onwongo amütö ni agwök ën botha kany, ëk ömia köny na kakari nakun pod atye i buc pi titö köp më Emuth na Bër.

¹⁴ Ëntö an onwongo ba amütö ni atim gin mörö nakun in ba iyeo, ëk bëni kür obed na calö gin mörö n'edii adia ië, ëntö obed kite na in iyeo ködë.

¹⁵ Gwök onyo gin n'ömïö ën opokere kodi pï karë na nönök onwongo obedo nï ëk igam ën yo bothi dong na twal—

¹⁶ pathï dökï na calö opii, ëntö na löö opii ökö, na calö omego më amara. Ën pïrë tøk botha ëntö pïrë tøk bothi rwök na calö dhanö na konyi ëka na calö omeru i Rwoth.

¹⁷ Pï manön, ka in ingeo nï an abedo atic awodhi, jöl ën kite na in onwongo itwërö jölöna ködë.

¹⁸ Ka cë ën ötimö gin mörö na rac bothi, onyo tye kï banyani mörö, kwan-gï i wia.

¹⁹ An, Paulo, ënë acöö waraga ni kï cinga. An abino cülöni—nakun an ba akobo nï in thon itye kï banyana, ën kwöni kikome.

²⁰ Eyo, ömëra, an amitö köny mörö kï bothi i Rwoth. Kwe cwinya i Kiricito.

²¹ An atye kï gen na tøk i komi nï in ibino winyo dhöga, ënë ömïö an acöö nini köp ni nakun angeo nï ibino timö na löö gin na an akwaö.

²² Gin acël nökenë: Yüb nïna kabedo mörö na an abino bedo ië, piën an atye kï gen nï lëgawu bino miö egönya më dwogo yo bothwu.

²³ Epapira, amabuc awodha i Kiricito Yecu, omothowu.

²⁴ Marako, Aricitako, Dema ëka Luka etic ewodha thon omothowu.

²⁵ Kica ka Rwoth Yecu Kiricito obed kodwu.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc. and SIL Uganda

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 2 Jul 2025 from source files dated 2 Jul 2025

61e7f4da-dc0f-50a1-9dae-64ee1b392d80